

摘藻堂四庫全書薈要

集部

欽定四庫全書薈要卷一萬五千五百六十三

集部

劍南詩彙卷七十三

宋 陸游 撰

秋日村舍

會稽城南古大澤
霜晴水落烟波迳
寒風蕭蕭凋榭柳
暖日暉暉秀麴麥
傳聞新詔募新軍
復道公車納羣策
忠誠所感金石開
勉建功名垂竹帛

又

川雲慘慘欲成雨宿麥蒼蒼初覆土芋肥一本可專車
蟹壯兩螯能敵虎村村婚嫁花簇檐廟廟禱祠神降語
兒孫力稼供賦租千年萬年報明主

村遊

閉戶苦無慘行行不覺遙人稀廢古井水退築新橋野
店聽山雨僧厨餽藥苗湖中有高士折簡恐難招

吳歌

勝負兩蝸角榮枯一蟻窠人情苦翻覆吾意久蹉跎困

睫憑茶醒衰顏賴酒酤坐人能聽否試為若吳歌

秋感

扶杖龍鍾迫耄期江湖木落更堪悲醉中光景似得志
夢裏朋儕如少時落筆龍蛇仲蒙帖

芮國器一字仲蒙

滿懷風

月季長詩前朝名勝凋零盡百歲關心只自知

又

聖世優容許乞身歸來猶幸齒齊民漁家那有懸車地
蔬食何施祝哽人獠婢臨溪漂衣絮蠻童掃葉續炊薪

生涯如此仍秋暮，賴是從來慣處貧。

紹興辛未至丙子六年間，予年方壯，每遇重九，多與一時名士登高於戴山、宇泰閣，距開禧丁卯六十年。憂患契濶，何所不有，追數同遊諸公，乃無一人在者。而予猶強健，慘愴不能已，賦詩識之。

故里登高接雋遊，即今不計幾番秋。一樽尚與菊花醉，萬事不禁江水流。薄命雖多死閭巷，逢時亦有至公侯。若論耄歲朱顏在，窮達皆當輸一籌。

結茅

結茆湖曲兩三間客少柴荆盡日闕
挿架圖書娛晚暮

滿灘鷗鷺伴清閒壁龕吳晉千年字

斲地得吳永安
晉太康中古甄

窗

納綦稽萬疊山自怪堅頑推不倒
時來臨水照蒼顏

老健

年垂九十身猶健竹屋荆扉不厭低
挈榼自沽深巷酒
擁衾遙聽別村雞家添豚柵還堪賦
路認牛欄每不迷
惟恨窮秋開霽少晚來小雨又成泥

幽居即事

壯歲本亡竒，頽齡又及斯。
極知身有幾，惟是醉相宜。
燒草溫新犢，編籬護伏雌。
謀生未忘念，笑語路傍兒。

又

晚日照茅茨，西風吹接籬。
貧思止酒易，老悔養丹遲。
斲地秋畦藥，焚香夜牒著。
呼兒具舟楫，吾欲上湘漓。

秋晚書感

犧象初心豈願才，溝中雖斷不須哀。
吾生自信雲舒卷。

客態誰論燕去來夕露正看沾草棘晨霜已見落楸槐
老年閉戶真無憾葑火更闌熟芋魁

小市暮歸

愛酒行行訪市酤醉中亦有穉孫扶林梢殘葉吹都盡
烟際孤舟遠欲無野餉每思羹首宿旅炊猶得飯雕胡
青山在眼何時到堪歎年來病滿軀

寓歎

日夕羊牛下月明烏鵲飛林林皆有託買買獨安歸疾

痼方求藥秋高未製衣岷峨不遂隱更恨昔謀非

又

交世非初志謀生又絕疎家貧思辟穀人忌悔知書門
異回軒巷藥無禿尾驢老頑君勿怪萬事有藥除

又

短髮不禁搔紆悲賴濁醪潦收溪瀨急木落寺樓高善
飯餘何欠看雲亦足豪今朝有竒事江浦得霜螯

題僧菴

細路穿雲塢危橋渡野塘人稀土花碧屋老瓦松長憂
患雙蓬鬢裝資一布囊燒薪藉餘暖今夜有新霜

哭季長

岷山剡曲各天涯死籍前時偶脫遺三徑就荒俱已老
一樽相屬永無期寢門哀慟今何及泉壤從遊後不疑
邂逅子孫能記此交情應似兩翁時

又

我荷鋤時君賜環君歸我復造清班無由促席暫握手

每得寄聲聊解顏造物不令老伴著書猶喜在名山

季長晚著
書數百卷

半年僅得陳尊鯽白首臨風涕自潛

魔境作頗思遠適賦此自遣

夜夜燃燈旦旦香修行老尚墮微茫齋居自許塵心盡
遇事方知業力强兩屨生雲入瀟皖孤舟載月上瀟湘
道人行李君毋笑惟是著筒與藥囊

枕上

窗紙蕭蕭印月痕數聲新雁過江村孤愁不與夢俱斷

羸老豈知身尚存
世事萬端歸蠹簡
秋風百感集清樽
荷鋤家圃知何憾
猶勝生求入玉門

讀函詩

我讀函風七月篇
聖賢事事在陳編
豈惟王業方興日
要是淳風未散前
屈宋遺音今尚絕
咸韶古奏更誰傳
吾曹所學非章句
白髮青燈一泫然

北窗

半世蟬嘶坐北窗
老年依舊守殘缸
買書安得黃金百

覓句如求白璧雙老氣尚思吞夢澤壯遊曾是釣巴江
寒生事業秋毫盡筆力終慙鼎可扛

小圃醉中作

搖落園林探借春耄期詩酒肯輸人狂時湖海猶嫌迮
達處羲農亦未淳木葉蔽身如盛服藜羹加糝即常珍
巢由尚隱唐虞代漫道桃源是避秦

秋冬之交雜賦

蓬戶終年閉靈臺一事無貧猶能自活衰未藉人扶兒

學無歆異孫啼有啓呱東隣麴道士折簡也能呼

又

霽日收殘靄微霜作早寒桐凋無宿葉水退出新灘室
小纔容膝門低每觸冠平生只此是何物動憂端

又

避俗嫌林淺安貧覺屋寬地爐燒葑火土榻藉蒲團稚
子誇藜糝高僧輟芋殘霜寒固難出不怕笑蹒跚

又

嶺下晨炊黍津頭暮繫船寒潮吞別浦老木慘蒼烟市
徙新山步耕侵古廟堦間人不蓄憤散髮醉江天

又

霧雨林塘晚風霜聚落寒衣冠存簡朴農圃備艱難春
簸麴供餌蒸炊豆作團此心如古井無地起濤瀾

又

碓舍臨寒水漁舟弄夕霏烏將九子過雉挾兩雌飛浮

世萍無蒂流年弩發機常思南鄭日縣驛跨驪歸

漢中
西縣

村落下臨溪水
景物頗似吾鄉

海山

補落迦山訪舊遊
菴摩勒果隘中州
秋濤無際明人眼
更作津亭半日留

飲村酒

湘浦騷人詠
啜漓黃州飲
溼又增竒紛紛
坐客評清濁
我已昏然睡不知

觀諸將除書

百鍊剛非繞指柔
貂蟬要是出兜鍪
罄得官若使皆齊虜
對泣何疑效楚囚

捫腹

身如椰子腹瓠壺
三畝荒園常荷鋤
著萬卷書雖不足
容數百人還有餘

醉歌

却日莫揮戈
君當聽我歌
花殘狂有限
酒熟悶無多
生
理憑長鏡
幽情寄短蓑
江湖秋萬里
未死且婆娑

自歎

惡殺常根食安貧但緼袍消搖敢言達簡默本非高入
剡逢飛雪遊吳看怒濤平生笑漁父苦語勸餽糟

村翁

不入城門三歲餘亦無車馬過吾廬食常羹芋已忘肉
年迫蓋棺猶愛書處處叩門尋醉叟時時臨水看遊魚
半生名宦終何得作箇村翁計未疎

不寐

一竿江渚寄沈冥衰疾侵凌失鬢青
困睫日中常欲閉
夜闌枕上却惺惺

書志

平生不喜作鵬搏常伴寒螿語
夜闌一椀淖糜支日過
數椽破屋著身寬衰殘雖已歎
垂白憂患未容侵渥丹
後五百年吾話在笑君虛坐幾蒲團

東偏紙閣初成

蚍蜉占雨解移穴蟋蟀畏寒先近牀
我亦聯屏為燠室

一冬省火又宜香

小豎醉

漫道樽中酒不空
歌呼誰解和衰翁
可憐小豎如猱獍
却有平陽吏舍風

雜興

寸陰可惜子所知
尺宅治生今未遲
虛費年光作閒事
人間信有白頭癡

又

堯舜桀紂皆腐骨
王侯螻螻同丘墟
麥苗覆塊鳩喚雨
常恨無人同荷鋤

又

一春妍暖無多日
八十康強有幾人
學不名家空自苦
路邊醉倒却關身

又

詩人肝肺困雕鐫
往往壽非金石堅
我獨適情無傑句
化工不忌遣長年

示兒孫輩

昔忝諸生後初非一世豪但希鄉有秩敢望郡功曹
歛版寧為辱扶犁亦足高兒孫勿妄想底處不徒勞

雜賦

養疾清溪曲風林幾著霜細書如助嬾薄酒不成狂
老歎朋儕盡閒知歲月長柴門偶一出倚杖立斜陽

又

孤學違流俗危機歷畏途逢人增懍怛看鏡失膚腴閉

戶書圍坐移燈影向隅空懷四方志泯默死東吳

又

家業貧原憲年齡老伏生但悲鸞獨舞那羨雁能鳴釀
酒秋常醉驅牛夜亦耕此身當自貴勿用作投瓊

又

貴固不如賤狂應未勝癡閉門真已矣命駕欲何之碧
縷生香袖清漪漲硯池是中有佳處不覺晝陰移

又

海上魚鹽聚烟中雞犬聲耕農叱牛去醉叟策驢行歛
薄民差樂烽消盜略平悠然憩松下我亦有幽情

又

櫛髮晨興後寬腰午餉餘講明窮理學讐校養生書倚
杖聽啼鳥臨池看戲魚怡然又終日底事解愁予

幽居

人間歲月苦駸駸白首幽居不厭深嬾愛舉杯成美睡
靜嫌對奕動機心山村野渡雙芒屨夜雪晨霜一布衾

不到康廬三十載夢攜巾鉢上東林

連日作陰頗有雨雪意

十分歷日過八九徂歲迫人殊可驚霜木蕭蕭臨古道
雪雲慘慘冒高城山頭噤雀無生意水面飢鳶有墮聲
剗壓新醅供旨蓄從今次第問春耕

山房

四紀移家剗曲傍自茨生草作山房寒侵夜艾知霜重
行遍天涯覺夢長戒婢無勞事釵澤課奴相率補陂塘

無衣已免幽人歎
數箔春蠶歲有常

梅市暮歸

老境惟閉門不與事物接
時逢佳山水尚復快登涉
山程策小蹇水泛搖短楫
今茲稅駕地佳事喜稠疊
雲生溼行滕風細掠醉頰
旅羹芡玉糝僧飯敷白氎
葑火煨芋魁瓦甑炊豆莢
經行出幽圃懷抱頗自愜
枯籬絡丹實深澗堆黃葉
白雲橫谷口綠篠穿山脇
還家寧迫暮取路羞徑捷
何當倚蒲龕一坐十小劫

法雲寺

法雲古蘭若西走

奏

錢塘路帆影梅市橋人語柯山聚

吾家昔為隣來往無晨暮十世三百年散徙非復故修
廊與廣殿亦已化烟霧經營久不倦大體始略具鐘魚
以時鳴軒檻有幽趣中庭掃蕪穢斷碣起顛仆老我絕
世緣隨身惟兩屨願言治北窗寂寞同子住

郊居

郊居本宴如觸事自多感況當搖落時雲重天慘慘路

窮非通途地偏無遠覽殘蕪連古道槁葉滿幽坎老來
厭了了萬事付黠闇地爐熾生柴喚客烹薺糝

作雪不成獨詠

淡日朝穿霧濃雲夜護霜風聲空浩蕩雪意愈微茫
几閒臨帖銅爐靜炷香悠然踐殘歲不是傲羲皇

聞雁

蜻蜒浦中聞雁聲寒侵短褐客愁生忽思大散關頭路
雪壓蒙羶夜下程

泛舟至蜻蜓浦小泊漁村

醉泛蜻蜓浦，伊啞一舫聲。
陂塘秋水瘦，墟落暮烟生。
野店曾留醉樵翁，不記名相逢。
雖憫惻懷抱，已先傾。

散策門外，隣叟怪其瘦

八十衰翁力既憊，強扶藤杖出門前。
朝晡恃粥何勞歎，齒脫牙搖已數年。

書警

束帶接一客，伸紙報一書。
未為甚疲勞，已覺不枝梧。
惟

有裊手坐儼然如齋居尚懼精神衰藥石以自扶

又

情慾雖害人要是自惑溺吾觀日用事飲食真勑敵乃
知七箸間其禍甚衽席堂堂六尺軀勿為口腹役

園中

殘菊無復花遊蠶抱枯叢我老復多疾寄迹窮巷中開
門無客至安取樽不空夕陽挂高樹此日還怱怱

冬晴行園中

冬溫光景如春妍暮年強健勝壯年手推園門拂石坐
豈暇為客思無羶殘蕪未死更鬱鬱晚菊欲稿猶鮮鮮
閑愁正得酒彈壓此夕預知當熟眠

又

桔槔灌蔬固已非竹筧澆花宜見譏杏繁梅瘦種性別
一氣生殺均天機細推物理孰不爾搏風未可嘲卑飛
君其置之且共酌白酒方熟黃雞肥

懷青城舊遊

宦途到處不黔突惟有劔南縻歲月屢遊老澤蒼玉嶂
疑是虛皇白銀闕松昉擣麩具晨餐櫛葉作衣勝短褐
泥飲不容繁杏落浩歌常送寒蟬沒水邊洞口適有遇
握手一言換凡骨少陵老子未識真欲倚黃精除白髮

晚立

倦憑小豎立柴門殘角疎鐘欲斷魂傷雁養翎依荻浦
渡牛浮鼻望烟村壯心已覺隨年往孤學何由與俗論
數點雨聲催返舍小窗燈火對壺飧

志喜

雪鬢蕭蕭九十翁，短檠猶喜策新功。
斲輪自得不傳處，治水本行無事中。
山市兒童隨小蹇，江村烟雨宿孤蓬。
更知衰疾從今減，萬里塵清蜀藥通。

窮居

仕宦初何得窮居，半士農清宵叔夜鍛。
平旦伯鸞春馬磨，猶支日牛衣亦過冬。
湖中有嘯父，何計得相從。

湖中隱士

月夜棹舟其疾如飛，
並湖有聞其嘯歌者。

冬暖園中萱草翦然海棠亦著花可愛作路浚井
皆近事也

暖景變嚴冬誰知造化功少留萱草綠探借海棠紅築
路橫塘北疏泉小嶺東欣然得佳處忘却歲將窮

即事示兒輩

今歲霜遲殊未寒籬東烏樞葉纔丹病輕漸喜免求藥
老甚難誇能據鞍隣舍僧貧分米少酒坊人熟督錢寬
晚來笑向兒孫說且得無生一話團

小雨頗寒

冬温初喜一寒新
紙閣塲爐養病身
殘雨已收猶點滴
斷雲欲散更輪囷
衣裳可典寧留筍
口腹雖饒肯累人
一事明朝差似樂
探梅聞岸接羅巾

題舍壁

身寄瓜牛廬手持科斗書
尚憎鴛鴦戀棧肯羨鶴筌車
富貴何加我山林亦宴如
年來常去殺不歎食無魚

又

草沒孔明廬塵流倚相書家居四立壁出駕獨轅車窮
達本無擇死生良自如鏡湖三百里處處侶禽魚

仲冬書事

邊頭無警少鈴聲病得新霜亦已平赤脚聽蛩勤夜績
蒼頭租犢待冬耕發奩雙兔駢頭卧溢榼芳醪徹底清
里巷紛紛誇節物春盤儺鼓漸闌情

醉舞

渭城朝雨不須歌爛醉江頭舞短蓑自是先生眼根鈍

天狐伎倆本無多

思蜀

白帝城邊八陣磧
青城山下丈人祠
英雄不生仙又去
零落草間多折碑

又

蜀莊鳴飛隘九區
超然豈止山澤癯
荒臺古井無處所
行子但覓房公湖

次韻李季章參政哭其夫人

飛蓋傳呼入省門，依然殘夢浣花村。
遙知最是傷心處，衫袂猶霑掃黛痕。

又

焚香黃閣退朝歸，道話時時正要提。
九十老翁緣底健，一生強半是單栖。

又

萬里羶車入鳳城，豈知遽已迫斜曛。
似聞後院思遺愛，掩淚人人說小君。

又

佛供齋僧冀萬分幽明路絕竟難論若為可慰重泉念
觸事平心無怨恩

又

煮蒿一去杳難知數紙遺書手自披切勿輕為歸蜀夢
竹枝忍復聽吾伊

又

害道無如狗愛嗔養生尤要嗇精神祝公少置空閨憶

天下安危在此身

又

富貴思歸豈坐迂
岷山種芋已成區
獨歸他日公無憾

天際烟帆與石俱

李公買石甚富將載以歸

試筆

人間元無第一手
萬事端如屈伸肘
但能看破即超然
何代商山無四叟
老民自視中何有
傾身經營一杯酒
此外管城差可人
相從且作明窗友

屠希筆

屠希一筆價必千，紹興初載海內傳。
高皇愛賞登玉几，求書蚤暮常差肩。
一朝希死子孫弱，歲久僅可售百錢。
宣城晉陵競聲價，外雖甚飾中枵然。
嗚呼世事每如此，使我太息中夕起。

寒夜吟

仕宦孰不願美官，無如兩膊聳聳寒。
可憐誤信紙上語，至死功名心未闌。
骯髒得倚門，矍鑠猶據鞍。
何如百年

中盡付一漁竿布襦可以度雪夕麥飯可以支朝餐但
知禪龕著身穩莫和詩人行路難

記夢

衣紳飄舉髮颼颼一鶴聊為太華遊每過名山思小憩
天風浩浩不容留

霜夜

月淡霜清夜漏遲疎鐘杳杳度南陂燈殘有恨欲誰語
雞老無聲如我衰使入蜀川方在道書傳淮浦定何時

若為可遣閒愁得獨擁寒爐藝豆箕

時方附蜀中便舟寄書張季長家人

未得古壽
書每闕懷

又

土牀紙帳卧幽寂枕上細聽城上更
楮杜燒殘地爐冷
喔咿聲斷天窗明風霜欲透草茨屋
鹽酪不下齋糝羹
猶恨扶犁老無力向來枉是請躬耕

歲暮

歲暮風霜慘村深草棘稠力衰行每蹇
衣薄鼻多鼽久

矣當長往悠然尚小留兒童報炊熟得飽且忘憂

與野人散策門外

春意侵寒律川雲結夕陰閒人了無事隣叟偶相尋
廢沼萍黏塊孤村雀滿林世間真夢耳何物可關心

十一月十一日夜聞雨聲

入冬殊未寒塵土冒原野溝溪但枯萍不聞清湍瀉
今夕復何夕急雨鳴屋瓦豈惟宿麥長分喜到菜把
明朝開衡門想見泥濺蹠豐年償可期擊壤歌幽雅

自述

怡然氣貌漸還嬰
淡飯麤裘過此生
儘道無方能縮地
夢中夜夜上青城

又

齒疏復牢能咀嚼
足攣漸愈可跣趺
短檠非復衰翁事
且與兒孫共地爐

歲暮老懷

粥美忘流蠹
燈孤伴獨吟
衾寒知夜艾
身痛卜天陰
薪

炭常憂絕杯觴不厭深故人今已矣三歎有遺音

謂季長也

書況

垂白渭南叟深居湖上村貧知蔬食美閒覺布衣尊琴
譜從僧借茶經與客論探梅來直步沽酒到偏門細織
籠安鶴頻求果飼猿舊書編未絕猶足教諸孫

劍南詩彙卷七十三

謹案卷七十二第二十三頁後三行四行悲蛩聲
裏落梧楸刊本楸訛秋短藥且慰經年別刊本
慰訛尉短褐猶懷卒歲憂刊本短訛豎今並改





總校官庶吉士臣張能照

校對官編修臣裴謙

謄錄監生臣范相

欽定四庫全書薈要

集部

劍南詩藁卷七十四

五

詳校官助教臣謝登雋



欽定四庫全書薈要卷一萬五千五百六十四

集部

劍南詩彙卷七十四

宋 陸游 撰

書道室壁

天地一飛蓬學道年來似有功習氣掃除空劫外

精神澡雪隱書中種瓜谿父時時見賣藥壺公處處同
莫謂與人緣苦薄相隨拍手有兒童

書志

蓬矢桑弧射四方豈知垂老臥江鄉讀書雖復具隻眼
貯酒其如無別腸疋馬揚鞭遊鄆杜扁舟振柁上瀟湘
自悲此志俱難豁且復狂歌破夜長

雪夕

目視眈眈左耳聾五畧略與管人同移燈自看於嬾影
取酒時澆礪礪胸東郭稍能師順子北山未敢笑愚公
空村雪霽風餐夜袖手悠然政策功

書枕屏

西域兜羅被南番篤耨香慣眠三丈日不識五更霜

又

心若冰將釋貌如兒未孩青城上官叟時入夢中來

又

甘菊縫為枕疎梅画作屏改詩眠未穩聞雪醉初醒

又

星斗闌干曉窗扉矐眈明金門與茅店一種是雞聲

二友

剗儲名酒待梅開
淨埽虛窗候月來
老子幽居得二友
人間萬事信悠哉

寄五郎兼示十五郎

八十九老可驚白髮森然憎鏡明
身當遊岱尚少駐
書欲藏山殊未成大兒為國戍絕塞
季子伴翁親短檠
古人已矣不可作
夜闌撫几歎平生

鄰曲相過

鄰曲集山家
相看一笑譁
扶行足蹉踔
半落齒槎牙
農

圃垂生理風霜感歲華老來情話少更盡此甌茶

東窗

臘近寒何薄秋衣著尚宜年光祈雪見節物賣燈知
川日初沉後樓鐘欲動時東窗對兒子聊與細論詩

曉寒

落月銜山口濃霜倒菊叢青檀壓衾暝輭火滿爐紅起
晚書虧課愁多酒策功杜陵如管否誰與問征鴻

小雪

簷飛數片雪瓶插一枝梅童子敲清磬先生入定回

書感

夢裏逢無咎天涯哭季長吾生亦有幾且復釣滄浪

家釀頗勁戲作

千古英雄骨作塵不如一醉却關身
鼎來雖恨王陵蕘熟味方知孟子醇
試問浩歌遺世事何如酣枕養天真
竹林嵇阮雖名勝要是淵明最可人

食薺糝甚美蓋蜀人所謂東坡羹也

薺糝芳甘妙絕倫
吮來恍若在峨岷
尊羹下豉知難敵
牛乳抨酥亦未珍
異味頗思修淨供
祕方常惜授厨人
午窗自撫膨脝腹
好住煙村莫厭貧

雜興

鋤草春愈茂
養草秋亦衰
不如兩置之
榮悴渠有時

又

栖雞未旦鳴
粒食固宜報
林鳥何預人
嘵嘵欲誰告

又

碩果墜池響魚隊散無迹空弦可落雁此事蓋自昔

又

徐硯欲其潔磨鏡欲其明願君試思之與已孰重輕

幽情

免歸又破六年閒每寄幽情煙水間清鏡不藏新白髮
芳樽猶惜舊朱顏一編蠹簡心空在百笈寒齋債未還
莫為岷峨勞夢想故鄉隨分有名山

醉歌

不癡不聾不作翁平生與世馬牛風無材無德癡頑老
爾來對客惟稱好相風使帆第一籌隨風倒拖更何憂
亦不求作佛亦不願封侯亦不須脫裘去換酒亦不須
賣劍來買牛甲第從渠饜梁肉貂裘本自出兜鍪燮理
陰陽豈不好纔得閒管晴雨如鶉鳩辛苦築壘拂雲祠
不如吟歎風月登高樓爾作楚舞吾齊謳身安意適死
即休

霜冷

梅花消息動江邊
漸見新春換故年
莫道孤翁心似鐵
夜來霜冷透青氈

讀書雜言

書亦何用於世哉
聖人之言如造化
魏魏地闢而天開
淵源虞唐至周孔
黃河萬里崑崙來
天不使諸儒為戰
國血又不使六藝
為亡秦灰
豁如盲瞽見暎日
快若擊
噴聞春雷挿空
秦華起突兀
垂天雲漢森
昭回奈何後
世獨不省顧捨
夷路趨邛邽
不知開眼蹈
履轍乃欲歸

罪車輪推福有基禍有胎一朝產禍吁可哀

東嶺

雲罅漏斜日駕言東嶺行鴉翻半天黑鷺起一川明
小立照溝水欲歸聞角聲君看浮世事何處異基枰

書戒

我幼事父師熟聞忠厚言治身接物間要使如春溫鞭
扑不可弛此語實少恩但能交相愛餘亦何足論家貧
賴奴婢炊汲與磨門餘力具茗藥夕飯或至昏有過尚

當貫況可使煩寃
出任推此心所樂
在平反寧坐輓弱
廢促駕歸丘園
吾老死無日作詩
遺子孫

書三壁

煙水雲山千萬重
散人名號繼吾宗
買雞養就冲霄鶴
拾子栽成偃蓋松
父老年年同社酒
兒孫世世作春農
晚窗睡覺添幽事
卧聽蘭亭古寺鐘

雪意

風吼江郊雪意濃
雲如兩陣決雌雄
山寒酒過平時量

窗黑書虧半日功閒話更端茶竈熟清詩分韻地爐紅
不須遽覓華胥路更俟天花落坐中

山房

何處合題詩山房病起時晨光鳥先覺春信柳偏知陋
學勤何益虛名悔可追布衾新絮暝惟與睡相宜

晨起

勛業文章謝不能生涯分付一枝藤身同湘浦孤舟客
心羨廬山下版僧倦枕厭聞窗外雨殘膏猶在壁間燈

草芝要及清晨服深愧蠻童為扣冰

草芝丹着山史
載之學士方

兩雁

兩雁東西來合羣以南翔鏡湖接天台海濶天茫茫冥
飛遠增弋長路諳冰霜君看此氣象豈復謀稻粱正爾
下杜陵已復掠瀟湘超遙萬里程燕雀安能量

書文彙後

上蔡牽黃犬丹徒作布衣苦言誰解聽臨禍始知非

題唐執中書樓

吾州唐子他州無閉戶徧讀家藏書志氣頗聞已山立
神仙固自多棲居終日坐忘對燕几有時出遊騎蹇驢
人生如此自可爾勿羨新貴高門閭

歲晚

雲暗郊原雪意稠天公似欲富來薶布衾歲久真如鐵
詎敢私懷一己憂

又

不學空門不學仙端居曾次自超然絳人甲子君休問

新歲吾兒本命年

又

戒殺家庖罷饋魚，病脾亦復禁寒蔬。
莫慙鄰里嘲枯淡，出甌香粳玉不如。

又

小岫嶙峋炷寶薰，卷書閒對一窗雲。
雁聲忽向天邊過，起立中庭看斷羣。

又

小塢梅開十二三曲塘水綻水如藍
兒童鬪采春盤料
蓼茁芹芽欲滿籃

又

久已功名不上心亦無心要老山林
鹿門采藥悠然去
千載龐公是賞音

雀啄粟

坡頭車敗雀啄粟桑下餉來烏攫肉
察時投隙自謂才
苟得未必為汝福
忍飢蓬蒿固亦難
要是少遠彈射辱

老農輟耒為汝悲
豈信江湖有鴻鵠

老翁

老翁睡少知遙夜
貧士衾單怯苦寒
悶裏不嫌村酒薄
瘦來偏覺舊衣寬
籬門遇健時能出
書卷乘閒亦取看
深愧野人憐寂莫
放鋤相喚共朝餐

寄子虞

人生恨無年
我老已爛熟
退耕鏡湖上
風雨有茅屋
事君闕補報
得此不啻足
餘年尚幾何
嫋嫋風中燭
大兒

戍塞垣馳馬佩天龍去家千餘里辛苦就微祿書來續
三紙語悲不忍讀適弟在我傍亦復淚溢目門戶嗟日
衰持守賴家督雪雲暗淮天念汝方露宿

雜詠

少日狂疎觸怒嗔每緣憂患喪吾真晚收咄咄書空手
却作騰騰任運人

又

得過一日且一日安知今吾非故吾
褻手明窗讀周易

不辜香鉢一齋盂

又

松肪燎火滿爐紅
粟煎湯到手空
試問坐居守丹竈
何如醉卧聽松風

又

舊聞五岳多靈藥
晚遇高人得祕文
夢境此身常是客
幾時歸臥華山雲

曉起折梅

織女斜河漏已殘
長庚配月夜將闌
小橋幽徑無人見
折得梅花伴曉寒

累日濃雲作雪不成
遂有春意

釀雪經旬竟不成
一霜却作十分晴
雲歸岫穴千峰立
暎入郊原萬耦耕
菖葉離離豐歲候
梅花眷眷故人情
道傍孤店新醅熟
已有幽禽一兩聲

晚晴出行近村閒詠景物

雪雲吹盡木陰移
正是先生曳杖時
老特行將新長犢

空桑卧出寄生枝
醫翁莫過囊探藥
筮叟晨占手布著
誰謂人間足憂患
未妨古俗自熙熙

道室戲詠

道身隱太華
壯歲客青城
采藥何辭遠
燒丹久未成
傳生已醉死
韓子得狂名
猶有殘詩在
他年遺後生

書感

人生百憂坐一官
況與羣飛接羽翰
兩具吳牛給畊足
三間茅屋著身寬
君蒿悽愴會不免
簡儉寂默差可安

康莊坦坦不整駕可憐平地生濤瀾

又

舞非得譜拍拍錯行未知津步步危劫灰消磨會當盡
太行突兀乃可移清晨瓦釜煮藜粥遙夜地爐燒豆箕
此中正自有佳處區區外慕寧非癡

又

茅檐住穩勝華屋茅糝味甘如大烹靜觀萬事付一默
掃空白髮非黃精丈人祠西鶴傳信小姑山前鼉報更

興闌却揮短棹去
曉渡清伊聽玉笙

臘月

今冬少霜雪
臘月厭重裘
漸動園林興
頓寬薪炭憂
山陂泉脉活
村市柳枝柔
春甃吾何患
嘉蔬日可求

雪作

今年冬暎異常時
造物收功乃爾奇
平野忽看吹雪片
清池俄復結冰澌
飛蝗埽地無遺種
瑞麥連雲有兩歧
想見市樓增酒價
溪居袖手歎吾衰

即事

雲本無心木不材平生得喪信悠哉釣魚每過桐江宿
賣藥新從剡曲回山圃蒿蔓晨灌溉地爐芋栗夜燔煨
人情萬變吾何預笑口何妨處處開

或遺以兩大瓢因寓物外興

擲葉為衣草結廬生涯正付兩葫蘆名山厯徧家何有
塵念空來夢欲無野鶴巢雲元自瘦澗松埋雪定非枯
悠然但覓高樓醉何處人間無酒徒

歲未盡前數日偶題長句

老向人間迹轉孤，參差煙火出菰蒲。
數畦綠菜寒猶茁，一勺清泉手自斟。
穀賤窺籬無狗盜，夜長煖足有狸奴。
歲闌更喜人強健，小草書成鬱壘符。

又

短褐蕭蕭一幅巾，明時乞與水雲身。
平生不售屠龍技，投老真為種菜人。
釜粥芬香餉鄰父，闌豬豐脂祭家神。
聯翩節物驚人眼，儼鼓停槌又見春。

臘月八日以粥相餽，此俗也。蜀人奉

豬供祭謂
之歲豬

又

拼攔小弁野人裝八十年舊話長真笑形骸無藉在
本知生世不牢強茅檐啼鳥初相命煙渚歸鴻漸著行
想得城中盛冠蓋家家來往薦椒觴

又

風號四野雲如墨徂歲消磨不滿旬瑞雪便應平地尺
野梅又報一年春長河斷渡冰將合古寺題詩手為皴

僵卧閉門行路絕安知今代獨無人

又

漸近新年日愈長不辭扶病舉椒觴了無一事干靈府
只合終身住醉鄉鬪釘春盤兒女喜擣蕪臘藥婢奴忙
蜀州白首猶癡絕更與梅花賦斷腸

余得蘆竹拄杖于舍傍民家似蘆非蘆堅勁輕滑
色如栗玉入手鏗然微有聲它杖莫及作五字唐
律記之

輕堅蘆竹杖入用自龜堂挺節冰霜後論交歲月長心
空無寵辱時異有行藏老病登臨少何妨日倚床

八十四吟

新歲八十四自宜形影孤睡憑書擯相愁賴酒枝梧兒
問離騷字僧傳本草圖孰言生計薄種芋已成區

又

七十人稀到吾過十四年交遊無輩行懷抱有曾玄飲
敵騎鯨客行追縮地仙城南春事動小蹇又翩翩

歲莫

書房偷得蝸廬樣，僅僅能容老病身。
紙被蒙頭方坐穩，却愁轉眼又新春。

又

淺色染成官柳絲，水沉薰透野梅枝。
客來莫怪逢迎懶，正伴曹孫竹馬嬉。

又

挹泉石鼎煎崖蜜，候火銅爐炷海沉。
一坐便應論十劫。

不知歲月去駸駸

又

久衰豈是見人時
健忘偏于養性宜
噉飯著衣常苦嬾
為誰欲理一團絲

又

燕脂斑出古銅鼎
彈子窩溪湖石山
老去柴門誰復過
天教二友伴清閒

又

少慕浮名百種癡老知世事盡兒嬉從今春困不須賣
睡到日高三丈時

書感

襁負客淮穎鬣鬣逢亂離中原遂乖隔北望每傷悲
渭題新賦遊嵩續舊詩死生雖異世此意未應移

泛渭賦遊

嵩詩見白
歐二集

書適

細讀養生主長歌歸去來山僧借水品溪父送琴材病

退稀求藥身閒日探梅今宵喜無寐
下有書回

學道

學道知專氣尊生得養形精神生尺宅
虛白集中局出
岫孤雲靜凌霜老栢青晨興取澗水
漱齒讀黃庭

舟中作

東浦菰蒲合南莊桑柘繁
皆村落名潮生無斷港寺廢有頽

垣糴米尋山步移舟泊水村野人多舊識
相對兩無言

得蜀信

齒髮凋零志氣衰強臨尊酒祇成悲少年半是投閒日
春事常當卧病時憂患頗疑書作祟功名不似老如期
青城舊友頻相約歸養金丹尚未遲

送蘇趙叟赴省試

關路誰非觀國賓此君肝膽獨輪囷故家遺俗欲墜地
博士議郎方要人久矣扁舟弄江月往哉駁馬踏京塵
勅中墨色如鴉溼日待東歸一命新

新春感事八首終篇因以自解

九陌風和不起塵平湖水解欲生鱗往來朝暮紛如蟻
得見新春有幾人

又

興來遊衍不辭遙吹帽風輕過畫橋猩血未看開露蕊
麴塵先已上煙條

又

一年最好早春天風日初和未脫繇坎坎圓鞀賽神社
翻翻小繖下湖船

又

憶到夔門正月初竹枝歌舞擁肩輿當時光景應如昨

綠鬢治中八十餘

夔府

又

錦城舊事不堪論回首繁華欲斷魂繡轂金羈三十里
至今猶夢小東門

又

玻璃江上柳如絲行樂家家要及時只怪今朝空卷出

使君人日宴墓頭

省州

又

梁州陌上女成羣
銅綠春衫卷畫帟
相喚遊家園裏去
鞦韆高挂欲侵雲

興元

又

烏藤即是碧油幢
百萬天魔指顧降
酣枕不知霜滿瓦
下床已見日烘窗

自歎

晨興袖手觀空寂
飯罷寬腰習按摩
堪歎一生閒日月
為身時少為人多

初春

春入陂湖已拆冰
流年誰解繫長繩
土膏動後麥苗長
桑眼綻來蠶事興
稅足了無徵
欠吏飯香時有乞齋僧
開正父老頻占候
已決今年百稼登

又

漠漠春寒罷對碁
霏霏春雨却催詩
梅花一樹映疎竹

茅屋三間圍短籬醉倒幸無官長罵出遊自有老人期
年光滿眼吾何憾又近吳蠶浴種時

簡傳十八官

漢孺

朋舊凋零盡新交得雋人文章諧律呂議論足精神甚
欲邀聯騎無如困負薪蘭亭修禊近為記永和春

開歲愈貧戲詠

謝事貧過筮仕初歸裝僅有一些車笥衣盡典仍耽酒
困米無炊尚買書澗底飽觀苗鬱鬱夢中聊喜蝶蘧蘧

商山幾許功名事老子如今却笑渠

戊辰立春日

昨夜風搖斗柄回典衣也復一傳盃故人久作天涯別
新句空從枕上來清鏡豈堪看鬢色小園剗欲覓桃栽
頽然却恨貪春睡不盡城頭畫角哀

又

卧聽城門出土牛羅幡應笑雪蒙頭但須晨起一卮酒
聊洗人間千種愁處處樓臺多俠客家家船舫待春遊

梅花未徧枝南北定為餘寒得小留

早春出遊

地爐久厭撥寒灰一笑真成病眼開
不恨城笳催日落且欣楊柳報春回
蹇驢破帽人人看南陌東阡處處來
聞道禹祠遊漸盛也謀隨例一持盃

春寒

故歲無多雪新春乃爾寒柴車歸里社
茅舍老江干客孰沽醕啜孫癡索飯
搏更憐菘芥長殊勝仰園官

園居

欲出還中止微陰却快晴檻花栽盡活籠鳥教初成身

寄江湖久心知富貴輕還嬰吾所證手自寫菴名

近名小室

曰還嬰

郊行

山色埽石黛江流漲麴塵春晴不終日老病動經旬竹
密有啼鳥村深多醉人東阡與南陌處處寄閒身

野望

偶攜一小豎徒倚望南山
舩笛為誰怨溪雲如我閒
洲長歸雁下天迥莫鴉還
安得一竿去終年煙水間

晨起

日高霜漸釋睡起髮猶蓬
小圃經行外新蔬檢校中
水開聞躍鯉天遠看飛鴻
粥熟還歸舍吾生亦未窮

午起

茶盃凝細乳香岫起微雲
樹影窗間見禽聲屋角聞
流年易拋擲舊學失鋤耘
師友今零落何人為運斤

劍南詩集卷七十四

欽定四庫全書叢要卷一萬五千五百六十五

集部

劍南詩彙卷七十五

宋 陸游 撰

自警

生世如夢境淹速無定時少壯不可恃况汝迫耄期五
官及百骸自揣日益衰客來能送迎要是強支持百口
皆新人所至無舊知紹興同朝者歸地靡復遺雖云窮
耐久造物豈汝私餘日真幾何得酒且伸着

春雨

春陰不肯晴
春雨斷人行
慘澹柴荆色
蕭條雞犬聲
香分豆子粥
美啜芋魁羹
猶勝梁州路
蒙氈夜下程

春寒

冉冉年華過
工元梅花如雪照
江村雲歸翠竇初收雨
人怕清寒嬾出門
香燼已殘爐未冷
客談方劇酒重溫
尚嫌塵境妨幽致
過球船聲莫正喧

湖桑球去
樊廬里許

自喜

了了復惺惺著龜未是靈閒中有富貴壽外更康寧身
備鄉三老家傳子一經春回元不記出戶四山青

又

身寄人間世心常古鏡如喚醒狂蝶夢埽盡老狐書年
出鄉間右貧過仕宦初村村是桃李豈獨愛吾廬

簡湖中隱者

夫子終年醉不醒若為問我故叮寧書因遣僕馱黃蘗
詩許登山斲茯苓疇昔但知悲驥老即今誰不羨鴻冥

清宵定計敲門否擬問黃庭兩卷經

短歌示諸稚

流年去不還老杖來無那雖甚顏原貧尚勝夷齊餓再
歸又六年疲馬欣解馱姑幸筮響空敢復希豆莖好山
嬾出遊敗屋得偃臥飢能儲粟盎病亦有藥裹酒蟻溢
皤鬢若雪落小碓香火失惰偷編簡謹程課豈惟洗幻
妄亦以起衰懦向來名宦事回首如棄唾義理開諸孫
閔閔待其大賢愚未易知尚冀得一個如其盡為農亦

未可吊賀歸耕豈不佳努力求寡過

王子猷謂竹為此君白樂天謂酒為此君余野處
無客每對竹獨酌得小詩

新種疎篁對小軒旋沽薄酒實空尊門無車轍亦何恨
有此兩君堪與言

會稽行

我欲遊蓬壺安得身插羽我欲隱嵩華歎息非吾土會
稽多名山開跡自往古豈惟頌刻秦乃有廟祀禹山形

舞鸞鳳泉脉流潼乳家家富水竹處處生蘭杜方舟泛
曹娥健席拂天姥朱樓入煙霄白堦臨雲雨修梁看龍
化遺箭遣鶴取茶芽可作經楊梅亦著譜湖蕝山蕨輩
一一難透數終年遊不厭冰玉生肺腑誦詩有樵童乞
字到俚姬况復青青衿盛不減鄒魯古詩三千篇安知
闕吳楚土風聊補亡吾言豈夸謝

野飲

春雨行路難春寒客衣薄客衣薄尚可泥深畏驢弱溪

橋有孤店村酒亦可酌
烏茈小甌炊丹柿青篾絡人生
憂患窟駭機日夜作野飲君勿輕名宦無此樂

作野飲詩後一日復作此篇反之

世事如海沙巧歷不能數
身居憂患中殆若墮穿虎
又如住敗屋岌岌日撐拄
中夜風雨至摧壓固其所孰能
知其然徒義以為主要于一念間
不敢欺仰俯兢兢日三省
寧可自莽鹵君看昔先師乃媿不若禹

春晴

雨斷雲歸兩作晴夕陽鼓角動高城客愁正得酒排去
草色直疑煙染成鷺為風和初命友鷗綠水長欲尋盟
不須苦問春深淺陌上吹簫已賣餠

又

常年春日少春晴拂面今朝暎吹輕水閣家家橫小舫
園亭處處聽新鷺桃花不管詩人老苜蓿空催野叟畊
自笑此生餘幾許銅駝荆棘尚關情

遣興

莫笑龜堂礪魄胸此中元可貯虛空尚饒靈運先成佛
那計辛毗不作公采藥偶逢丹井客買蓑因過玉霄翁
不須更問歸何許散髮飄然萬里風

又

我是仙蓬舊主人一生常得自由身退歸自合稱山長
變化猶應侍帝晨得酒不妨開口笑學人難作捧心顰
塵中且復隨緣住又見湖邊草木新

開歲屢作雨不成正月二十六日夜乃得雨明日

行家圃有賦

東風催雨破天悭，行圃歸來剗解顏。
百草吹香蝴蝶鬧，一溪漲綠鷺鷥閒。
老來每歎論心少，貧甚方知覓醉難。
猶賴籃輿無恙在，呼兒結束入南山。

書屋壁

築室鏡湖濱，于今四十春。
放生魚自樂，施食鳥常馴。
土潤觀鋤藥，燈清論養真。
桃源處處有，不獨武陵人。

又

鳥道經行穩巢居臥起寬鹿衣栽短褐龜屋製危冠舊
慕嵇中散今師靖長官蛟龍雲雨上未必勝泥蟠

與兒孫同舟泛湖至西山旁憩酒家遂遊任氏茅
菴而歸

過球維舟古柳根却扶拄杖入煙村印泥接迹牛羊過
投宿爭林鳥雀喧酒保殷勤邀淪茗道翁僂僂出迎門
郊居不與人間事惟有畊桑得細論

日莫自大滙村歸

筍輿伊軋莫山昏水敗陂塘路僅存出谷鐘聲知過寺
隔林人語喜逢村廟堞荒寂新犁地堤草淒迷舊燒痕
兒子念翁霜露冷遙持炬火出柴門

八十四吟

八十仍逾四遲留未告行筮言災退散醫賀脉和平
畊
救猶能力癡頑每自驚所嗟經學廢心媿濟南生

晚步至湖上

柴車無與駕蓬艇亦須人賴有拄杖子能扶羸病身雲

山翠屏合煙月玉鈎新蕭散湖塘路微風吹芎中

春陰

窗昏不見字今日罷觀書迹寄浮生內心遊曠劫初太
山均蟻垤聖域亦蘧廬兀坐還成倦荒畦去荷鋤

題野店壁

斷橐投衣橐殘壺挂馬鞍寺荒尋店久橋敗涉溪寒道
里逢人問題名拂壁看平生慣行役隨處得加餐

題寺壁

菴居渾似罷參僧
除却癡憨百不能
意倦有時憑曲几
興來隨處曳枯藤
雲山直去寧須伴
蘚磴高攀不計層
聞道鼉鳴天欲雨
松門小住看雲興

題幽居壁

青山四抱路盤紆
天與先生卜草廬
雲冷數聲聞斷雁
溪清百尺見遊魚
新醪薄薄閒尋醉
殘髮蕭蕭悶憶梳
莫謂躬耕便無事
百年京洛尚丘墟

又

聲利場中偶解圍，悠然高枕謝招揮。
山前曳杖尋僧去，林下收碁送客歸。
城市氛埃那許到，比鄰煙火自相依。
纓冠束帶前身事，散髮今惟勃落衣。

思葭州

老來百念盡消磨，無奈雲安入夢何。
壯憶公孫劍器舞，愁思賓客竹枝歌。

又

武侯八陣孫吳法，工部十詩韶韻音。
遺蹟故祠春草合。

略無人解兩公心

梅開絕晚有感

年年踏雪探梅開二月今年始見梅從此逢春心轉嬾
小詩不擬覓花栽

又

尋梅不負雪中期醉倒猶須插一枝莫諱衰遲殺風景
卷中今歲欠梅詩

園中晚飯示兒子

一飽何心慕萬鐘
小園父子自相從
蚍蜉布陣雨將作
蛺蝶成團春已濃
澗底東新供晚爨
街頭糴米續晨春
盤餐莫恨無兼味
自繞荒畦摘芥菘

自詰

修行力量淺
觸事常寡悰
端居本無事
奈此百憂攻
今晨默自詰
世豈不汝容
漱濯臨清流
歎歌蔭長松
緩步有夷途
遠眺多奇峯
野叟時相尋
村酒亦自釀
于道忽少進
一掃芥蒂胸
輟釜本常情
寧說飯後鐘

野飲

農事未興思一笑春薺可采魚可釣霏霏小雨忽已晴
堤上相攜踏殘照村場酒薄亦有力把釵相娛不辭醜
眼花耳熱言語多霍然已醒如過燒人生百年會有盡
世事萬變誰能料酒空人散寂無聲為君試作蘇門嘯
茆亭

讀罷楞伽四卷經其餘終日坐茆亭靜聽溪碓春雲母
細斲松根采茯苓大道粗嘗聞海若高情未至媿山靈

寒泉新滌甘于乳晨起何妨挈半瓶

身世

身世飄然似斷雲時人誤許與斯文旋償碑債動千里
強理詩情無一分子美舊悲殘酒炙幼安今老白襦裙
餘生自喜渾無事清夜銅爐炷寶熏

家有兩瓢分貯酒藥出則使一童負之戲賦五字
句

長物消磨盡猶存兩大瓢藥能扶困憊酒可沃枯焦童

負來山店人看度野橋畫工殊好事傳寫入生綃

禹寺

禹寺荒殘鐘鼓在我來又見物華新紹興年上曹題壁
觀者多疑是古人

旅遊

壯志蹉跎雪滿頭久將餘日付滄洲閒雲不入老人夢
隣笛似知孤客愁小築聊須傍蘭渚片帆那復到樟樓
生涯草草真堪笑三十年來一破裘

又

本自無心落市朝不妨隨處狎漁樵
螺青點出算山色石綠染成春浦潮
縣驛下時人語闌寺樓倚處客魂消
流年不貸君知否素扇團團又可搖

貧歎

貧到今年極蕭然四壁家弊袍生蟣蟲
粗飯雜泥沙浩浩乾坤大茫茫歲月賒
故鄉煙水窟別擬卜生涯

東窗

九折危途寸步難
至今回首尚心寒
元來自有安身處
茆屋三間似海寬

又

才薄常為世俗輕
還山力不給躬耕
即今贏得都無事
袖手東窗聽雨聲

又

俗事紛紛意不攄
兀如頭垢念爬梳
東窗且復焚香坐
閒看微雲自卷舒

又

寂寂東窗午夢殘更堪春雨作春寒
蠻童未報煎茶熟一卷南華枕上看

近村

家居每思出出亦無與遊江山豈不佳
乃復生我愁不如適近村家家業農疇
深巷鳴鷄犬長陂下羊牛棗熟稻當穫
桑落酒可筭寧無賓祭須柿栗良易求
腐翁日過門得藥疾自瘳婚嫁不出村
百世加綢繆我來每絕

歎恨不終歲留人生正應爾底事須王侯

石帆山下作

石帆山下古苔磯回首人間萬事非能飲上池何患死
不營尺宅欲安歸寒龜瑟縮搢床老倦鶴翩躚帶箭飛
堪笑年來殊省事就憑樵女綻春衣

旦起

殘燈冷火待窗明稍覺今朝病體輕已賴林鳩知宿雨
更煩簷鵲報新晴

又

地爐晨起撥寒灰
困睫濛濛尚嬾開
正倚蒲團覓殘夢
一聲啼鳥又驚回

書況

自從請老鏡湖濱
萬事不關林下人
鴉去鴉歸還過日
花開花落又經春
官微也過千重浪
身在依然一幅巾
晨突有煙吾事了
濁醪不復惱比鄰

閒中戲賦村落景物

遊宦才能薄還山日月長買牛捐寶劍取酒解金章
泉脉疏供啜松肪煉按方北窗貪兀傲南陌喜彷徨僧過
傳著法醫夾寄藥囊泛舟經姥廟策蹇上僮塘嬾似嵇
中散癡如顧長康人間須埽迹隨處是羊腸

姥廟僮塘皆湖上地

名

又

覆篠初成屋編荆旋作門孤雲生釣瀨微雨過棊軒柳
種來傍縣

族子為取柳本于餘姚茅氏

花栽乞近村石歌聊可坐地

褊不成園酒榼列楓瘦香爐斷竹根海鷗呼可下隴鳥
教能言搏飯迎雙鶴聯緇繫小猿山家雖寂莫隨事有
盤飧

予好把酒常以小戶為苦戲述

我非惡旨酒好飲而不能方其臨觴時直欲舉斗升若
有物制之合龠已不勝豈獨觀者笑心亦甚自憎正如
疾寇盜憤切常橫膺蹭蹬忽衰老何由効先登上天無
長梯繫日無長繩可歎固非一壯志空飛騰

春日對花有感

天天杖頭花鬱鬱地上草方春萬物遂我乃獨衰槁少
時喜方藥晚亦學黃老又非愛名宦壯歲迹已埽如何過
八十尚復未聞道偃行阡陌間齒搖而髮縞名山可巢居
決去恨不早宴坐精思林猶能養梨棗

出遊遇雨而返

柴門方出雨霏霏未到湖邊促駕歸深炷爐香掩屏卧
誰知不為溼春衣

又

荒山前頭野水邊
東行西行不自憐
天公豈亦哀老子
風雨留教終日眠

記閒

白雲堆裏看青山
猿鳥為隣日往還
黃綺後身應我是
再來依舊一生閒

二感

狸奴睡被中
鼠橫若不聞
殘我架上書
禍乃及斯文
乾

鵲下屋簷鳴噪不待晨但為得食計何曾問行人情得暝
而安飢得飽而馴汝計則善矣我憂難具陳

題柴言山水

陰陰山木合幽處著柴荆喧中有靜意水車終日鳴春

又

懸水三十仞疾雷聞數里正暑凜生秋倚杖者誰子夏

又

高秋風雨天幽居詩酒地君看此氣象其可折簡致秋

又

草亭臨峭絕霜嶂起嶙峋危磴儻可上老夫思卜鄰冬
草亭獨坐

掃地垂簾坐草亭東風吹頰醉初醒睡蛇死後魔無力
疾豎降來藥有靈在手殘梅香淡泊傍檐幽鳥語叮嚀
老人不是神通妙世事元來要飽經

修居室賦詩自警

荒園二三畝敗屋八九間初至如逆旅忽逾四十年屋

日已朽蠹我老不自還茅可刈之野木可伐之山尚復
不能具日夜憂其顛况我虛幻身念念隨化遷齒墮髮
亦縞鏡中失朱顏其危甚于屋何恃能牢堅豐汝梨與
棗養汝汞與鉛防疾如待敵愛氣如守關謀于履霜初
懼在橫流前書紳銘席端雖老尚可全

遊迹

遊迹荒村慣忍貧秋毫不使喪其真家居亦以古為鑑
事過始知天勝人臨食致思方下箸讀書有得每書紳

放翁老矣當知幸布褐藜藿畢此身

春晴登小臺

不管筇枝破綠苔
閒穿萬竹上荒臺
幽花經雨自開落
啼鳥喜晴時去來
河岸家家裝彩舫
兒曹處處唱青梅
誰家老子癡頑甚
看改新元十一回

魯墟舟中作

春浦南來元不到
畫橈偶復入鷗羣
人家遠火林間見
船底微波枕上聞
山口正衙初出月
渡頭未散欲歸雲

錦囊詩草新寥落得句猶堪寄一欣

貧病戲書

得米還憂無束薪今年真欲甑生塵
椎奴跣婢皆辭去始覺盧仝未苦貧

又

頭痛涔涔齒動搖醫驕折簡不能招
亦知客疾無根柢少健還能起負樵

又作二首自解

盡日溪邊艇子斜
治生不種邵平瓜
已分鄰舍紅蓮米
更啜僧房紫筍茶

又

靈府安平四體和
經時止酒頰常酡
老生要是常談爾
吐納餘閒即按摩

挾書一卷至湖上
戲作

買地孤村結草廬
蕭然身世落樵漁
一編在手君無怪
曾典蓬山四庫書

謝客相過

我力日愈衰人事不敢倡窮巷春多泥何以稅客鞅諸
君顧何取勤懃問亡恙賦詩代尺書跂望徒悵悵

書辛

土盎常餘菜山庖不絕煙罷醫翻少疾無術自長年小
舫煙波宅閒身陸地仙東窗最佳處日對坐忘編

書歎

鬢髮承學紹興前歷看人間七十年撲滿終歸棄道側

鷓夷猶得載車邊
釣舫夜泛吳江月
醉眼秋看楚澤天
造物未容書鬼錄
殘春又藉落花眠

古興二首各五韻

草衰何預人每起
徂年悲日月纔幾
何又見青青時青
青雖滿眼行矣當
復衰盛衰還無端
其理可前知人生
死則已千載無還
期

又

月出橫林上宿鳥
無定枝物生各畏
禍所託輒蹈危老

人倚壁坐大鼾驚羣兒雖云差自適見事亦太遲猶有
一可喜永謝世俗羈

病中有述二首各五韻

萬事有常理中智皆能知禍福如白黑不待諏著龜疾
患初萌芽未有旦夕危每能自省察百鬼安能窺一息
生百疾速死乃自詒

又

為國恃久安變起最莫測釋楚為外懼此實計之得吾

儕學養生事事當自克老無聲色娛戒懼在飲食要須
銘盤盂下箸如對敵

黃鴉吟

嗟哉黃鴉一何陋性喜隱翳藏荒園煙深翅重飛不起
鳴聲穀穀知雨候夜與妖鵲羣又似惡白晝羽毛不足
辱彈射滋味不足登俎豆捕之既無用嚙之又不售譬
之人以支離而全木以擁腫而壽若予者智不能知農
圃學不能舉孝秀名不詳世動得嘲詬是亦天下不材

之尤尚何議乎汝後

恩封渭南伯唐詩人趙嘏為渭南尉當時謂之趙渭南後來將以予為陸渭南乎戲作長句

老向人間久倦遊君恩乞與渭川秋虛名定作陳驚坐
好句真慙趙倚樓棧豆十年霑病馬煙波萬里著浮鷗
就封他日輕裘去應過三峰處處留

幽居

宿志在人外清心游物初猶輕天上福那習世間書薈

菜挑供麩槐芽采作葅朝晡兩摩腹未可笑幽居

肩輿至湖桑埭

籃輿隨意出衡門日已沉山野未昏小市鼓祠湖上路
短垣高柳埭西村麥苗極目無閒土塘水平堤失舊痕
明詔裕民聞屢下老農何以報君恩

半俸自戊辰二月置不復言作絕句

力請還山又幾年何功月費水衡錢君恩深厚猶慙懼
敢向他人更乞憐

又

俸券新同廢紙收
迎賓僅有一絕棗
日鋤幽圃君無笑
猶勝牆東學僧牛

頭風戲作

出門處處皆桃李
我獨呻吟一室中
只道有詩毆瘧鬼
誰知無檄愈頭風

茅齋

茆齋雖絕小老子策新勛
磴落霏霏雪爐香裊裊雲心

將鷗共遠巢與鶴中分幾許人間事吾廬寂不聞

畊桑

老病雖俱至畊桑亦未遲
兒童誇犢健婦女閃蠶飢
月落泉鳴夜燈殘鼠齧時
但當尋熟睡萬事不須思

春遊

方舟衝破湖波綠
聯騎蹋殘花徑紅
七十年間人換盡

放翁依舊醉春風

子年十四始到禹祠
龍瑞今七十一矣

又

熟睡從來少天色東吳況是足春寒城南藉草可痛飲
安得酒腸如海寬

又

蘭亭路上換春衣梅市橋邊送夕暉聞有水仙翁是否
輕舟如葉棹如飛

又

沈家園裏花如錦半是當年識放翁也信美人終作土
不堪幽夢大匆匆

蔬飯

春事已闌珊山村未褪寒
筍生初入饌薺老尚登槃
僧飯時分鉢園蔬不仰官
枯腸更禁攪姑置密雲團

海棠歌

我初入蜀鬢未霜南充樊亭看海棠
當時已謂目未覩
豈知更有碧雞坊碧雞海棠天下絕
枝枝似染猩猩血
蜀姬豔粧肯讓人花前頓覺無顏色
扁舟東下八千里
桃李真成僕奴爾若使海棠根可移
揚州芍藥應羞死

風雨春殘杜鵑哭夜夜寒衾夢還蜀何從乞得不死方
更看千年未為足

園中作

湖曲舊誅茆松陰近結巢安閒多熟睡衰退少新交雨
漬丁香結春生豆冠稍良辰不把酒新燕解相嘲

書意

整書拂几當閒嬉時取曾孫竹馬騎故故小勞君會否
戶樞流水即吾師

又

人生祇要常無事
念欲紛紛喜見侵
贈子祕傳安樂法
秋毫莫遣動吾心

又

籬角緋桃落漸稀
晚風吹去點苔磯
揮金豈必如疎傅
二畝春秧也是歸

晚春

世事紛紛不足論
流年去似海濤翻
莫因齒髮悲殘景

且喜荆扉是故園千里桑麻無曠土數家雞犬自成村
鄰翁過我誇秧信雨後春泥一尺渾

又

莫笑花前醉墮巾放翁又看一年春尋巢燕熟頻穿戶
釀蜜蜂喧不避人楚廟羔豚初散社稽山筍蕨正嘗新
要知不負年光處南陌東阡自在身

劍南詩彙卷七十五

謹案卷七十五第一頁後二行春雨斷人行刊本
人行訛行人今改

第二十一頁前八行敢向他人更乞憐刊本憐訛
鄰今改

第二十四頁後五行楚廟羔豚初散社刊本羔訛
恙今改



總校官庶吉士臣張能照
校對官編修臣楊壽楠

謄錄監生臣熊輝